

150; parti a dì 20 avosto, le qual subito le vendete a ducati . . . l'anfora, per esser le prime.

Da poi disnar fo Consejo di X, *simplice*, et steno fino ore do di note, et expediteno li zentilhomeni e altri nominati di soto, menati per sier Orsato Zustinian l'avogador di comun, a cui tocò il Colegio, et preso di procieder a uno a uno, fo condanati, e primo:

Sier Lorenzo Polani di sier Bernardin, per aver robato, che zuoba el sia impicato in mezo le do colone poi disnar.

Sier Balisera da Molin qu. sier Nadalin, qu. sier Marco da la Madalena, qual avia la condanason al collo per ladronezi e assassinamenti facti, ch'el sia descopà e squartado, *ut supra*.

Sier Alexandro Navaier, di sier Michiel el consier, per ladronezi e assassinamenti facti, che 'l sia descopà e squartado, come in la sopradita condanason, *ut supra*.

Vicenzo e Agustin fradelli diti Contarini, fo fioli di Antonio da la Seda fo prior al Lazareto, che li diti, per ladronezi e assassinamenti facti, che i siano discopadi e squartadi, *ut supra*.

Sier Antonio Dolfin qu. sier Domenego, al qual è stà fato il salvoconduto per uno mexe, et è venuto, per il qual si ha abuto la verità di molte cosse, *ut supra*, che li sia sparagnà la vita, e che 'l sia confinato in Cipro, con taia ducati 5000, e venendo sii . . .

Marco da Leze, fo fiol natural di sier Domenego qu. sier Zuan, Matio Barbo fiol natural di domino Agustin canonico di Padoa, Donado pyctor et Januli Greco, absenti e chiamadi, incolpà di latrocinii e assassinamenti, *ut supra*, che li diti siano banditi di terre e luogi nostri, si da mar come da terra, et il Leze venendo in le forze sia discopà et squartà in mezo le do colone, con taia ducati 1000; li altri tre, venendo, siano apicadi, con taia ducati 500.

43* Cornelio Michiel fiol natural di sier Jacopo da San Canzian, per non esser in dolo, ma fo trovato da la putana a San Marzilian quando fo prexi i altri, e fo retenuto, ch'el sia liberato; e cussì questa sera andò a caxa.

Et uno altro nominato Andriol Stella non fo expedito, è in prexon, per esser di prima tonsura, over sarà sgradato, over sarà fato morir cussì.

Sier Hironimo Michiel di sier Nicolò qu. sier Nicolò, qual era bandito per biasteme, et fato soldato a Padoa di domino Beneto Crivello, el qual è stà quello che poi retenuti questi, mandò dai Cai a dimandar salvoconduto et dirà gran cosse, li fo dato

et vene, e manifestò questi tali aver fato il delicto in Canareio di quella dona etc., qual à inteso da sier Antonio Dolfin, *ut supra*, però il dito sier Hironimo Michiel sia assolto dil bando, et . . .

Or expediti cussì questi malfactori; fono questi 5 che dia morir cavati di camera e mandati da basso, e sciolto il Consejo di X. Sier Orsato Zustinian l'avogador e sier Anzolo Trivixan Cao di X, *justa* il solito, andono a le prexon a dir la deliberation facta ozi nel Consejo di X a tutti cinque, che zuoba i doveano morir.

E sier Alexandro Navaier dimandò: « Che morte signori? » l'avogador li disse: « Squartadi, e vui Polani apicato ». Disse *iterum* il Navaier: « E come squartadi? » Rispose il Cao di X: « Sareti descopadi ». Allora rimaseno come morti, e Agustin disse, e li altri in zenochioni: « Signori, al manco ne sia taià la testa ». E cussì si partino. Dita condanation sarà publicà a Rialto. Et sier Antonio Dolfin non era in preson per il salvoconduto li fo fato.

Questi sono nel Consejo di X, ozi.

El Serenissimo.

Sier Zacaria Gabriel.

Sier Pièro Marzelo.

Sier Alvise Grimani.

Sier Luca Trun.

Sier Alvixe Sanudo.

Avogadori.

Sier Zuan Capello.

Sier Orsato Zustinian.

Sier Francesco Donado, el cavalier.

Consejo di X.

Sier Anzolo Trivixan

Sier Francesco Falier } Cai.

Sier Michiel da Leze

Sier Marco Donado.

Sier Hironimo Contarini qu. sier Bertuzi procurador.

Sier Piero Lion.

Sier Nicolò di Prioli.

Sier Zorzi Pixani, dottor, cavalier.

Sier Andrea Magno.

Sier Zuan Venier qu. sier Francesco.